

# QVÆSTIO MEDICA.

QVODLIBETARIIS DISPUTATIONIBVS

MANE DISCVTIENDA, IN SCHOLIS MEDICORVM,

Die Iouis XIX. Ianuarij,

M. ROBERTO PATIN,

DOCTORE MEDICO,

MODERATORE.

*An fortes creantur fortibus?*

**R**ERVM quæ huius mundi ambitu continentur, nulla non id agit, vt seipsam conseruet, eademque perpetuo maneat. Quemadmodum autem pulcherrimæ & summæ diuinæ id vnum præ cæteris diuinitatis suæ Specimen obtinent, vt suapte naturâ nulli affectioni subiectæ, sempiternæ sint & immutabiles, sic quæcumque mortali conditione genitæ ab ea perfectione absunt, eò continenter aspirant, vt quoniam penes substantiam singularem stare semper nequeunt, specie saltem persistant. Hoc porrò solâ assequuntur generatione, cunctis viuentibus eo fine à Natura tributa, vt suum in locum reponant aliquid sibi simillimum, impendentemque ceu saxum Tantalo mortis necessitatem leniant, vti sui relicta imagine. Scilicet quo nobilius est, & à scopo minus aberrat vnumquodque generans; hoc sese in genito plenius representat & exprimit. Propterea, qui solus intra se perfectissimè generat Pater Diuinus, suam ipsam numero planè eandem naturam impertit Filio, à quo alius est sola ratione personæ, quâ non potuit non distingui. Res creatæ quia ad excellentem illum generandi modum non valent assurgere, ideo solum specie cum re producta conueniunt: sic homo hominem, leonem leo, oleam procreat olea. Ab hac lege ne tunc quidem receditur, cum præpostero alienoque complexu iunguntur diuersi ordinis animalia.

¶ iii

**N**EC verò in omni viuientium propagatione speciei duntaxat seruanda studet Natura : sed etiam proli omni pacto procreatoribus assimilandæ , cum sit alioqui diuersitatis amantissima : hæc eius operum ac votorum summa est , ad quã & contendit perpetuè , & peruenit sæpissime ; in iis præsertim quæ vel ob mistas maris & feminæ vires , ex seipsis progignunt , nullo alterius congressu , vel sexu distincta , nullo <sup>curtius</sup> motu distrahuntur ab his quibus intendunt Naturæ sacris . Quis enim , nisi fortè Deliacus aliquis gallinarius vsu doctus , ouum ab ouo discernere , in plantarum genere fruticem à frutice , lactucamve à lactuca , è qua orta est , aut in brutarum animantium familia partum adultum facile internoscat ab iis , à quibus olim spiritum duxit ? Homo ipse qui maiori fingitur apparatu & studio , hac eadem conditione nascitur : & nisi parentes corporis mole , colore , habitu , oris & vultus specie referat , ac demum ab iis plerosque status & motus effingat , quodammodo monstrum est , & inchoatum opus naturæ labentis , siue illius facultatis ignauia , cuius est aptè tornare corpus , siue minùs tractabilis , nec ad omnia flexibilis materiæ vitio , vel næuos ipsos , & si quod illorum corporibus inest singulare signum , foetus reddit sibi inusta velut domestica & gentilitia quædam insignia : nempe sic tota in eo est , vt quasi leuius peccatura , infelicem , aut etiam nullam edere malit , quàm dissimilem parentibus sobolem .

**Q**UID moror ? Nequidem satis est similem tibi se vel corpore tantum , vel vultu dederit , morum quoque filius sit oportet , in quo te totum tanquam renouatum ac deũuo victurum contemplaris , cuius commodis magis studes , quàm tuis . Non possunt profectò mores certiùs , quàm stirpis genere pendi : vix quidquam enim habemus virtutis aut vitij , quod non traxerimus à parentibus : qui tametsi suum nobis non commodarint animum ; ad nos tamen transmississe videntur , quia instrumenta omnia quibus vititur , & citra quæ omnino nihil agat , nobis suppeditauere . Quippe delibatus è singulis corporis partibus humor ille seminalis , qui parentis vtriusque quasi compendium est , & quidem animatum , vbi diuinã comprehensus fauiscã hæsit in vitam , adeo secum minimè mendax earum omnium importat exemplar ; vt formetur in hominem penè eundem temperie & effigie . Hinc cum diuerse in corporibus propensiones , & diuersi cuiusque impetus ac studia ab humorum , partium , & temperici diuersitate sobolescant ; quali corporis , animique valetudine parentes fuerint , tales ab his expecta liberos , putà biliosum ex bilioso , melancholicum à melancholico , à prudenti prudentem , à fatuo fatuum , à calculoso calculosum , sicque

7

Nov. 65

phthisicum, epilepticum, podagricum à parentibus pari labe contaminatis.

**N**VNQVID verò suos habent Heroas casæ? Nonne quosdam nobiles non accepit, sed sua fecit virtus? & contrà multis longo sanguine censis Heroibus, sua fuit dedecori proles? Ita quidem aliquando fit, sed nullâ naturæ culpâ. Mira omnino vis est ingenita à principiis, insuntque semini quædam semina velut elementa morum, quæ nisi multa se aliunde opponant, paria his ex quibus orta sunt, facient. Sed velut translata tenerior planta cælo soloque mutato, nonnihil mutat ingenium; sic quia multa sunt à quibus assiduo nostra temperamenta petuntur, cum ad rem pertineat, quâ quisque cæli temperatione, quomodo affectis compositisque sideribus, quibus in terræ plagis locisque viuat, quàm incommodis commodisve ventis, cibus, aquis utatur, interdum & bona indoles ab his omnibus, aut etiã prava consuetudine, nimia magistrorum indulgentiâ, ignaviâ luxuriæque corrumpitur; & qui naris obesæ, diis que aduersis genitus aliquid ab ortu deprauatum habere videbatur, scitè sublatis idonea exercitatione vitii, aduocataque conuenienti temperie, sibi primum obstructam gloriæ virtutisque viam citius quouis alio emetitur. Hac ratione nonnumquam in eodem Socrate, duplex est Socrates. Fere tamen ad mores natura recurrit priuatos, fixa & mutari nescia; & vt multa extent quæ corporis animique vim insitam acuant ac promoucant, multa quæ obtundant; numquamnon interlucet aliquid, vnde facile æstimes, quò quisque sponte sua, & ex natia inclinatione propendeat. Quid ergo doctrina proficit? vt politiora, non vt meliora fiant ingenia: solida namque virtus nascitur magis, quam fingitur, ipsamque adeo nemo sine indole colet, aut litabit gloriæ.

**O**PTIME igitur ad procreandos liberos comparati sunt fortes illi & altioris sensus homines; qui summotis vitiis omnium turbidis moribus, nec metu debilitati, nec impotenti illo temeritatis incurfu transuersi aguntur; sed moderationis consilijque beneficio inter res secundas & aduersas, eâ sunt firmitate mentis, quæ sanæ rationis modum numquam sinat expugnari: corpore autem sic vtuntur & valent, vt & cibo non plus indulgeant, quam ipsi sustinendo sit opus, & Veneris vsum intra coniugum caritatem, suscipiendæque prolis necessitatem, clausum teneant. Qui tam iustum in omnibus rebus temperamentum adhibere norunt, quis neget beatos? Verum longe feliciores liberos, quorum pectoribus præstans ille corporis, animique vigor,

ac cæteri paternarum virtutum numeri, nullo vocis ministerio, nullo litterarum usu, tacitis viribus cum ipso spiritu infunduntur. Haud dubiè quæ vitam ab his est orsa principiis, cum se matura leuabit progenies, cum sanctam sine labe domum, vitioque carentem viderit, atque adeo ipsam exempla domestica magnis authoribus animum subitura confirmarint; non potest non florere quibuscumque bonis, haustaque à progenitoribus eorum semina, in tam vberes honestatis, constantiæ, atque integritatis fruges effundere: vt è sapientiæ stirpe creatam dicas. Atque his tam faustis auspiciis propagata soboles efficit, vt & genuisse iuuet, & generare libeat.

*Ergo fortes creantur fortibus.*

---

Proponebat Lutetiæ CAROLVS BARALIS,  
Parisiinus, A. R. S. H. M. DC. LI.

---

DOMINI DÔCTORES DISPUTATVRI.

*M. Ioannes Garbe.  
M. Paulus Courtois, Cens. Sch.  
M. Petrus Martan.*

*M. Guillelmus Petir.  
M. Ioannes le Preuost.  
M. Ioannes Cousin.*

*M. Petrus de Beauvais.  
M. Robertus Tuloise.  
M. Dionysius le Soubis.*

---

PARISIIS,

Prostant Exemplaria apud NICOLAVM BOISSET, Typographum  
in Platea Malbertina, ad insigne D. Stephani.

*cette thèse est la 1002<sup>e</sup> du tome VI in 8<sup>vo</sup>  
des thèses de la faculté.*